

МАДАНИЯТ МАРКАЗИ ТАЪМИРЛАНДИ

Ўзбекистон Республикаси Президенти Шавкат Мирзиёевнинг 24 январда Олий Мажлисга йўллаган Мурожаатномасида 2020 йилда бюджет маблағлари ҳисобидан 22 та театр ва маданият обьектлари қурилиши ва реконструкция қилиниши, давлат-хусусий шериклиги асосида 20 та маданият маркази ва истироҳат боғлари фаолияти йўлга қўйилиши алоҳида таъкидланди. Бағдод туманидаги “Чўринди” маданият маркази биносининг маҳаллий ҳокимлик ташаббуси билан жорий таъмирланиши ва замонавий қиёфа касб этишини Мурожаатномада кўрсатиб ўтилган улкан вазифалар ижроси ҳамда эзгу мақсадлар ижобати йўлидаги яна бир қадам сифатида баҳолаш мумкин.



- Мазкур бино узоқ йиллардан бери фойдаланишда бўлгани сабаб, анчайин таъмирталаб ҳолатда эди, - дейди туман маданият бўлими бошлиғи Ахроржон Хатамов. – Ҳаттоқи, марказ фаолияти маълум муддат тўхтатиб ҳам қўйилганди. Туманимиз ҳокимлиги қўллови билан таъмирлаш ишларига етарлича маблағ ажратилгач, бу ерда алоҳининг маданий ҳордик чиқариши ҳамда ходимларнинг самарали меҳнат қилишлари учун қулай шарт-шароитлар яратилди. Жумладан, 300 та ўриндик ўрнатилди, саҳна ва девор пардалари янгиланиб, бинонинг иссиқлик тизими таъмирланди.



Маданият маркази қошида кутубхона фаолияти ҳам йўлга қўйилган. Айни пайтда 4 мингдан зиёд китоб фондига эга бўлган мазкур кутубхона китобхонлар билан ҳамиша гавжум. Шунингдек, ёшларнинг бўш вақтини мазмунли ўтказиш, ёш истеъдод эгаларини ҳар томонлама қўллаб-куватлаш мақсадида 14 та тўғарак ташкилланиб, уларда 200 нафардан зиёд ўқувчи санъатнинг турли йўналишларида ўз маҳоратларини оширмоқдалар.

Бағдод тумани ҳокимлиги

Ахборот хизмати.

2020-01-29 18:49:22